

# Elegija za ludu noć

*Kad noćas opet planu lampioni  
za ovu ludu noć,  
sačuvani, možda, od prošlog slavlja  
biće sve isto:  
proždrljive oči  
ispijat će raskoš blještavu,  
djeca će željama svojim  
čerupati jelku kroz staklo  
pogledom  
luckasti hamal Lutvo  
satima će parati čaršijom,  
blesavo se cerekati  
upornoj igri svjetala i boja,  
zaboravit će jučer,  
briga ga za sutra,  
noćas je lijepo....*

*U krčmi na kraju grada  
isti će možda  
sjediti gosti,  
isto piće piti,  
uz istu muziku cupkati  
i noć ovu  
za čitavu godinu živjeti, jer...*

*Sutra već  
umrijet će lampioni,  
tužne će biti jelke  
očerupane*

*pogledom dječijim,  
umorni hamal Lutvo  
mislit će samo  
o svome teretu,  
u krčmi na kraju grada  
opet će možda  
isti  
sjediti gosti  
i isto piće piti  
i žaliti;  
za ovu noć ludu što minu,  
život je kraći,  
za cijelu godinu..*